




- 37







A C T A  
IN CONSISTORIO SECRETO  
H A B I T O  
A SANCTISSIMO DOMINO NOSTRO  
P I O  
DIVINA PROVIDENTIA  
PAPA SEXTO


*Feria VI. Decembris MDCCLXXVIII.*

SOLEMNI DOMINICÆ NATIVITATIS DIE  
STATIM POST MISSAM PONTIFICALEM

IN BASILICA VATICANA

Prope B. M. V. de COLUMNA, & S. LEONIS  
MAGNI Altaria. Qui locus nunc pro Sacra-  
rio est, nondum novo, quod construitur,  
absoluto.

R O M Æ, MDCCLXXVIII.



Ex Typographia Reverendæ Cameræ Apostolicæ.



P. V. 27.

---

Reimpresa Cracoviæ in Typographia Seminarii  
Academico Diœcesani.



REIMPRIMATUR.  
JOSEPHUS OLECHOWSKI  
ARCHIDIACONUS Cathedralis Cracoviensis,  
AUDITOR & JUDEX Generalis.

*mpp.*



VENERABILES FRATRES.

Quam bonum sit confidere in Domino, VENERABILES FRATRES, splendidissimum exhibet argumentum ea, quæ inter sævientes procellas aura prodiit securior, ob quam repletum est gaudio os nostrum, & lingua nostra exultatione. *Iusta enim & rationalis est causa gaudendi*, ait Leo Magnus, *cum a Sacerdotibus Domini ea gesta cognoscimus, quæ & paternorum canonum regulis, & apostolicis congruunt institutis.* (a) Magno munere Divinæ Misericordiæ multiplicata sunt gaudia totius Catholicæ Ecclesiæ: Quippe studio Venerabilis Fratris Clementis Wenceslai Archiepiscopi Trevirensis, & S. R. I. Principis Electoris, quem sine summa laude nominare non possumus, perniciosissimi errores extincti sunt, & in victoria veritatis dudum falsa dogmata perierunt. Non ignoratis plane quæ, & quanta intulerit damna Johannes Nicolaus Episcopus Myriophytanus, Ecclesiæ Trevirensis Suffraganeus, cum ab Anno Millesimo septingentesimo sexagesimo

A 2

mo

(a) *Epist. 26. part. 2. Oper. Edit. Tynar. 1767.*



mo tertio, sub e mentito Iustini Febronii nomine, Libros edidit, quibus, ut impugnaret hujus S. Sedis Jura, veritus non est Ecclesie ipsius Unitatem dissolvere. (b) Modo idem Archiepiscopus pro Religionis ardore, quo incensus est, pro pastoralis, qua maxime valet, virtute, suæque mentis præstantia, illum ipsam Febronium induxit ad solemnem errorum suorum Confessionem, & Retractionem. Plura, & gravissima sibi ab illo proposita veritatis argumenta cum Febronius excepisset, serioque recogitasset, facile animadvertit se fuisse terrena opinione deceptum; & ut in Sacris est Literis apprimè versatus, agnovit commentis suis obsistere, atque adversari Christi Domini doctrinam, Patrum testimonia, Conciliorum Decreta, aliasque Ecclesiasticas Sanctiones. Actum etiam facile Nos credimus, Animo ejus obversatum esse quidquid in Sacris Conventibus Trevirensibus Anno Millesimo quingentesimo quadragesimo nono habitis, quos ipsemet iterum prælo subjici voluit, (a) sancitum fuerat de tenenda, docendaque

---

(b) Libri Iustini Febronii prohibiti fuerunt Decretis Congregationis Jndicis 27. Februarii 1764, 3. Februar. 1766. 24. Maii 1771. 29. Martii 1773.

(a) Hist. Trevirens. Diplom. Auctor. Jo. Nicolao ab Honthelm Episcopo Miryophyt. Tom. 2. pag. 740. Edit. August, Vind. Anno 1750.



daque Romanæ Ecclesiæ doctrina, aliisque servandis Ecclesiasticis Juribus; quod perspicue agnovit nulla debere varietate corrumpi. Sed adfuit certe, eumque intime commutavit, illabens in cor, mentemque Divinus Spiritus, ut repente Febronius lapsum intelligeret, & ruinam sentiret, atque desleret. Tum, ut ad Patrem sapiens rediret, qui insipiens a Patre recesserat, cum statim retractasset, rejecisset, ac detestatus esset, quæ suis antea Libris scripserat; veniam a Nobis petiit, Apostolicæ Sedis Clementiam imploravit, tamque promptum, ac paratum ad præstandas omnes officii sui partes exhibuit animum, ut etiam si plurima jam accurate revocasset, cetera tamen omnia, quæ Nos adhuc emendanda esse censeremus, sine ulla cunctatione se correcturum promiserit. Sed præstat hæc ipsa, VENERABILES FRATRES, ex Archiepiscopi Litteris, & Febronii Retractatione cognoscere, quas Nostrarum ad Principes Epistolarum Secretarius recitabit. Ac primum audite Litteras.

*Sacrarium ingressus R. P. D. Benedictus Stay, Brevium ad Principes Secretarius, Cappam indutus, alta voce perlegit Litteras sequentes.*





## BEATISSIME PATER

**B**enedictus DEUS & Pater Domini Nostri JESU CHRISTI, Pater Misericordiarum, & DEUS totius consolationis, qui me consolari dignatus est in gravissima tribulatione mea, ut possem & ipse oppressum simili sollicitudine Sanctitatis Tuæ animum sublevare.

Magna nimirum tristitia mihi fuit, & continuus dolor cordi meo, dum viderem Suffraganeum ac Coepiscopum meum NICOLAUM ab Hontheim, Virum tot ceteroquin nominibus mihi carum ac venerandum, utpote qui ob excellens & singulare ingenium, immensum omnigenæ eruditionis apparatus, longævam experientiam, mores a puero intactos, & fervidum restaurandæ disciplinæ, Ecclesiæque ampliandæ studium præ alio quovis oneri meo pastorali levando aptior esset, quique, nisi eum zeli amaritudo, & inconsiderantia in transversum egisset, Ecclesiæ bono, solatio, ac præsidio natus videbatur; dum, inquam, viderem Virum hunc terminos, quos posuerunt Patres Nostri, quin imo quos Patribus nostris Divinus Legifer posuit, transilire, atque a veritatis tramite tanto longius, tantoque obstinatius aberrare, quo ipsum magis decipiebat species recti, & optimæ voluntatis conscientia.

Interim tamen Scriptis suis unitatem Catholicam scindebat, ad quam reducere Protestantes moliebatur; Zizaniorum extirpandorum prætextu, ex Agro Dominico evellebat & Triticum; & fundatæ supra Petram Ecclesiæ ruinam parabat, dum illi etiam suppetias ferre cogitaret: Sed & adversus Sanctam, Catholicam cuius non nisi cum Religione suscipiendam, Romanam Sedem attollere quandoque supercilium, ejus jura extenuare, prærogativas obtinere, Jurisdictionem universalem, quam tota Antiquitas venerata est, e medio tollere, imo & ejusdem Sedis Præsules hinc inde probris conscindere

non



7  
non dubitavit; eo nimirum, ut asserit, consilio, ut  
vigentes in Romana Curia abusus aboleret, Sedem-  
que Divi PETRI, sublatis adscititiis, iisque monstro-  
sis parergis, nativo suo splendori restitueret.

Ut autem omnia hæc tutius ageret, & parata  
fors temeritati suæ mala declinaret, ficto, Justini  
videlicet Febronii, Nomine Scripta sua vulgabat; &  
ita quidem caute, ut quamquam Authoris Nomen,  
uti hominum neminem, ita nec me lateret, argumen-  
ta tamen deessent, quibus eum conscripti Operis  
convincerem. Sed & verebar, ne si eo hominem ad-  
gerem, ut Febronianorum Scriptorum se authorem  
fateri cogeretur, jam a seclarum numero & Magna-  
tum præsidio audacior effectus, eo protervix proce-  
deret, ut infelicitis Operis elucubratione optime se de  
Ecclesia, & veritate meritum esse contenderet; sic-  
que ignis non jam lente & clanculum, ut antea, sese  
diffunderet, sed disjectis repagulis, in vastissimum  
& nunquam forte amplius extinguendum incendium  
erumperet.

A DEO itaque Optimo Maximo consilium, au-  
xilium, temporaque opportuniora expectanda esse  
dixi; quem in finem indignas quidem, at ince-  
ras tamen & fervidas, cum gemitu Columbæ, bo-  
norumque omnium votis unitas preces ad Cælum  
direxi; illius quoque frequenter interponens autho-  
ritatem, sanguinem, & merita, qui, quæcumque  
in Nomine ejus a Patre petituri essemus, ea Nos  
consecuturos esse promisit.

Quam benignum, quamque inclinatum suppli-  
cationibus meis se præbuerit Consolator in se spe-  
rantium DEUS, dignabitur Sanctitas Tua ex adjun-  
cto Libello intelligere.

Prætermitto, ne longior sim, narrare, qua occa-  
sione dictum Suffraganeum meum Officii sui commo-  
nere incœperim; quibusque gradibus eum divina ele-  
mentia ad Sanctitatis Tuæ pedes reduxerim.

Verum hoc, utpote virtutis eximie argumen-  
tum, in Venerabilis Senis laudem præterisse nefas



8  
fo et: quod videlicet illum a primo instanti auspiciati inter nos negotii usque ad ejus consummationem, nunquam non humilem, docilem, modestum, & ad quævis jussa mea capeſſenda obedientem ac promptum expertus fuerim.

Nec solum Sanctitati Tuæ ad saniora consilia reuerſum Authoris nostri animum dictus ejus Libellus exhibebit; sed & cum intimi solatii sensu considerandum sistet, quam humiliter cum Sancta Sede reconciliari postulet, imo quantum gratiam hanc promereatur & magnanima errorum suorum Confessione, & amara pristinæ rationis, factorumque minus rectorum pœnitudinæ, & inconfusibili hodiernorum ejus sensuum Orthodoxia, & acri, quo modo incenditur, inlata Ecclesiæ damna reparandi desiderio.

Atque inde est, cur supervacaneam rem me acturum arbitrer, si Te rogem, Sanctissime Pater, ut pœnitenti paternum sinum pandas; neque enim dubitare fas est, quin illius Caritatem æmuleris, qui super degeneri, sed jam converso Filio misericordia motus, accurrens cecidit super collum ejus, & osculatus est eum, eique cum Stola prima omnem paternum amorem reddidit.

Certe, si quidquid Tibi est in me benevolentiae (& multoties probasti inesse quam plurimum) revertenti ad Te Carissimo Fratri meo exhibueris, & Viscera mea in Domino reficies, & incredibile me voluptate perfundes.

Confidens in bonitate Tua, hæc duxi scribenda Tibi, sciens quod super id quod rogo facies; nec præteritarum modo ejus noxarum oblivisceris, sed & Filii loco eum habebis, amabis, Litterisque amicis & senium ejus solaberis, & animum adversus stolidi hominum judicia confirmabis: Dignum quippe, & consentaneum Tuæ Clementiæ arbitror, ut qui suo erga Sanctam Sedem obsequio fines nullos posuit, eum illimitato prorsus affectu Sanctitas Tua complectatur.

Transfusa jam in sinum Tuum, Beatissime Pater,



9  
ter, suavissimorum solatii, gaudii, spei, ac fiducia  
sensuum exuberantia, superest ut & coram Te depo-  
nam humillimæ ac profundissimæ subjectionis tri-  
butum, quo, quamdiu vixero, in persona Sanctitatis  
Tuæ honorare intendo Venerabilem illam Petram,  
cui inædificaturum se Ecclesiam suam Salvator pro-  
misit, & contra quam, haud secus ac Ecclesiam  
ipsam, nullæ unquam inferiorum potestates prævali-  
turae sunt.

Cumque in persona Beatissimi Prædecessoris Tui  
Divi PETRI Apostolorum Principis, non Agnorum mo-  
do omnium, sed & Ovium Tibi cura concredita sit,  
provinciaque demandata confirmandi Fratres Tuos;  
intolerabili fere & viribus meis longe superiori dua-  
rum Ecclesiarum pondere quasi ad ima depressus, ad  
Te oculos, manus, vocemque attollo, suppliciter o-  
rans, ut fatiscentem sub tot Animarum regimine,  
de quarum singulis severo Judici mihi olim reddenda  
erit ratio, animum allevare, cæcutientem illumina-  
re, aberrantem reducere, torpentem excitare  
digneris Consiliis, Jussis, ac præsertim plurimum va-  
lenti apud DEUM Precatione. Quæ omnia, ut Apo-  
stolica Benedictione mihi confirmare velis, vehemen-  
ter a Te peto, qui finaliter me gregesque mihi, ut ut  
indigno, commissos paternæ Tuæ benevolentia com-  
mendans, filialemque reverentiam & amorem humi-  
li Sacrorum Pedum osculo profitens subscribor.

SANCTITATIS TUÆ

Ehrenbreitstein die 15. Novembris 1778.

Devotissimus, & Obedientissimus Servus, & Filius  
Clemens Wenceslaus Archi-Episcopus, & Elector.

**Nunc animos vestros ad Febronianam Re-  
tractationem advertite.**

*Idem R. P. D. Stay legit Retractationem  
Episcopi Myriophytani, Suffraganei  
Trevirensis.*

BEATIS.





## BEATISSIME PATER

SI quid mihi in longæva, & ad exitum declinante vi-  
sta evenit triste, & acerbum (evenerunt autem haud  
paucæ;) illud omnium maximum, & intima vi-  
scerum penetrans est, quod per Reverendissimum  
Dominum Archi-Episcopum meum, Pastorem vigi-  
lantissimum, ad me pervenit, Sanctitatem Vestram  
indigne ferre plura, quæ in Libris Justini Febronii, seu  
quovis alio adscitito nomine a me evulgatis, aut  
forte etiam mihi suppositis continentur, utpote sum-  
mæ Sedi injuriosa, nec non supremis ejus juribus  
detrahentia, proin Sanctæ Nostræ Religioni (sane  
præter, & contra meam intentionem) noxia.

Cum autem nihil majus, & Viro bono dignius  
sit, quam agnitum errorem confiteri, & præteritam  
culpam melioribus factis redimere; sic imprimis a-  
gnosco, & desleo errorem, ex zelo indiscreto Pro-  
testantes Catholicæ Ecclesiæ, & Apostolicæ Sedi re-  
uniendi, huncque in finem etiam usus, & praxes par-  
ticularium Ecclesiarum, easque persæpe ultra mo-  
dum exaggeratas, omnibus Ecclesiis applicandi studio  
natum; neque eum, quoad vixero, deslere desinam.  
Dein deliberatum mihi constitutumque est, postquam  
culpam confessus, & veniam gratiamque a paterna  
Sanctitatis Vestræ clementia suppliciter deprecatus fu-  
ero, sicuti jura & decorem Summæ Sedis pro viri-  
bus tueri, ita & ejusdem Sanctæ Sedis judicium Li-  
bris & luminibus meis præferre, nullumque meæ er-  
ga eandem submissioni ponere terminum. Eripuit mi-  
hi autoritas Sanctitatis Vestræ (in qua authorita-  
tem JESU CHRISTI recognosco) errorem. Itaque præ-  
sentes, eosque genuinos animi mei sensus de Statu  
Ecclesiæ, & summis Sedis S. PETRI, Apostolorum  
Principis, juribus, ad Successoris ejus Pedes omni-  
cum submissione depono, tanquam in qua vivere, &  
mori cupio. Sunt autem ii sequentes.

In primis profiteor & agnosco cum Tournelio,  
Claves



Claves Ecclesiæ, & uni PETRO, & Unitati simul a CHRISTO concessas esse, ita ut unum aliud non excludat. Oportebat quippe meminisse cum *Tertulliano*, in *Scorpiaco Cap. 10.* *Eas Dominum Petro, & per eum Ecclesiæ reliquisset; & cum Optato, de Schism. Donatist. Lib. VII. n. 3., Petrum Claves Regni Cælorum communicandas ceteris solum accepisse; Ut enim de PETRO ait S. Leo, Serm. III. in Anniv., Si quid (CHRISTUS) cum eo commune ceteris voluit esse Principibus, nunquam nisi per ipsum dedit quidquid aliis non negavit: Scilicet Claves datæ sunt uni PETRO, quatenus ille Primatum & regiminis potestatem accepit a Domino, idemque personam totius Ecclesiæ, ceu Supremus ejusdem post CHRISTUM, & sub CHRISTO Rector ac Moderator, gerebat. Datæ quoque sunt Unitati, id est in bonum Unitatis, & PETRO præcipue, ut dictum est, & aliis etiam Apostolis, eorumque Successoribus Episcopis, quibus docendi, ac regendi ministerium & potestas, exclusa plebe, commissa sunt in verbis: *Sicut me misit vivens Pater & ego mitto Vos, Accipite Spiritum Sanctum, quorum remiseritis peccata &c. Eantes docete omnes Gentes &c. Attendite Vobis, & universo Gregi, in quo Vos Spiritus Sanctus posuit Episcopos regere Ecclesiam DEI:* Attamen cum dependentia a PETRO, & cum subordinatione ad ipsum, qui eas, ut superius ait *S. Optatus*, communicandas ceteris solum accepit. Explodendus proinde error, haustus ex Protestantium fontibus, Ecclesiam Collegium esse, non Societatem, ut Catholici sentiunt, in qua baptizati fideles ex institutione CHRISTI sub legitimorum Pastorum, ac præcipue Summi Pontificis, regimine degunt; cujus regiminis potestas, a CHRISTO constituta, veram subjectionis, & obedientiæ obligationem multitudini, seu universitati imponit.*

Profiteor DEI Filium, dum suam Ecclesiam fundare, eamque esse unam vellet, formandæ ac regendæ huic Unitati Primatum in illa instituisse; huncque S. PETRO commisisse. Firmiter assero cum



SS. Patribus, *Cypriano, Hieronymo, Optato Milevitano, Gregorio Nazianzeno, Joann: Chrystimo, Ambrosio, Leone M., Gregorio M., & aliis*, propterea inter duodecim Apostolos unum electum esse, ut Capite constituto, super quo Ecclesia fundata est, Schismatis tollatur occasio: Ideo CHRISTUM, c' in suis Apostolis potestatem largiretur, ab uno, cui Primatum tribuit, cœpisse, ut unam Ecclesiam, & unitatem Cathedræ, simulque unitatis originem demonstraret: Schismaticum esse, qui, ut ait *Optatus*, contra singularem Cathedram aliam collocat, vel ab ejus communione per obedientiæ negationem recedit: Non habere Petri hæreditatem, qui Petri Sedem impia divisione discerpit; siquidem ubi est Petrus, ibi est Ecclesia; PETRUM Ecclesiæ fundamenta (Apostolos, sibi ut Capiti subordinatos) in fidem suam recepisse. Eidem Petro, in quo Primatus excellenti gratia præeminet, ipsorum etiam Apostolorum curam a CHRISTO esse commissam: Ipsum esse Os, & Principem Apostolici Cœtus.

Affero hunc Primatum (qui non ordinis, inspectionis, ac directionis tantum est, sed & veræ Auctoritatis ac Jurisdictionis) quia non minus, quam Unitas ipsa, pro cujus conservatione ac regimine institutus est, perpetuus esse debebat, in Petri Successores Romanos Pontifices, Sedemque Apostolicam, hujus Unitatis Centrum, & Radicem, jure divino transisse, ut nulla ratione transferri a Romana ad aliam Sedem valeat: Ad hanc Ecclesiam propter potioem principalem (id est, propter supereminentem ejus dignitatem atque auctoritatem) uti ait *S. Irenæus*, *necess. esse omnem convenire Ecclesiam, hoc est eos, qui sunt undique, fideles*: Eam esse Caput Ecclesiarum, a qua, ut inquit *Bonifacius Papa I.* *quisquis se abscindit, sit a Christiana Religione extorris*. Huic accedunt Patres Concilii Constantinopolitani IV. *Sequentes*, ut ajunt, *in omnibus Apostolicam Sedem, & observantes omnia*



omnia ejus Constituta, speramus, ut in una Communitate, quam Sedes Apostolica prædicat, esse mereamur, in qua est vera & integra Christianæ Religionis soliditas; promittentes etiam, sequestratos a Communione Ecclesiæ Catholicæ, id est, non consentientes Sedi Apostolicæ, eorum nomina inter Sacra non recitanda esse Mysteria.

In horum sequelam cum Patribus Concilii OEcumenici Florentini agnosco, Romano Pontifici in B. PETRO pascendi, regendi, ac gubernandi Universalem Ecclesiam a Domino Nostro JESU CHRISTO plenam potestatem traditam esse. Sicut autem pascendi, & regendi potestas sine conveniente Auctoritate, Jurisdictione, ac Coactione (ad quam etiam, velut gravissima Spiritualis poena, pertinet Excommunicatio, quoad fructum & suffragia generalia separans) subsistere non potest; sic talem a Christo ipso promanantem in Romano Pontifice, tanquam Universalis Ecclesiæ Capite, Principe, ac Magistro residere affirmo.

Profiteor quoque Romanum Pontificem esse summum Judicem Controversiarum in rebus Fidei & Morum; ac in omni ejusmodi Controversia exorta, hinc inde dissentientibus animis, tum maxime audiendam vocem Hieronymi scribentis ad Damasum: Ego Beatitudinî Tuæ, id est, Cathedræ Petri communiõne confocior: Super illam Petram ædificatam Ecclesiam scio. Quicumque extra hanc Domum Agnum comederit, profanus est . . . . Non novi Vitalem, Meleium, respuo, ignoro Paulinum; quicumque tecum non colligit, spargit. Et: Adhuc in tres partes scissa Ecclesia ad se rapere me festinat. . . . Ego interim clamito: Si quis Cathedræ Petri jungitur, meus est.

Addo speciatim adversus errorem tum veterum, tum recentiorum Novatorum, qui spreta multitudine Episcoporum, Capiti suo Romano Pontifici expresse, vel tacite adhærentium, Ecclesiam, ac veritatem in sua paucitate concludere non verentur, fieri non posse, ut a vero aberret Corpus Episcoporum, qui Capiti suo Romano Pontifici

tifici



tifici adhærent: Sic hæresim Lutheri jam ante *Concilium Tridentinum* ab Ecclesia, præeunte Pontifice, per ejus Oraculum ultimato & irrevocabiliter damnatam fuisse; quandoquidem Ecclesia Capiti unita, sive per Orbem Univerfum dispersa, sive congregata in Conciliis Generalibus (in quibus Episcopi jure proprio ac judiciaria potestate sibi ex institutione Christi cohærente una cum Summo Pontifice definiunt) in dictis Causis definiendis errare non possit, nec ab ea Cathedra discedere, ad quam, teste CYPRIANO, perfidia non valet accedere; & in qua, manente dispositione veritatis, B. PETRUS in accepta fortitudine PETRÆ perseverans Ecclesiæ gubernacula non relinquit, ac per Successores suos sedere, ac loqui non desinit.

Agnosco pariter datam Ecclesiæ a CHRISTO auctoritatem judicandi de sensu, seu doctrina Propositionum, Librorum, & Authorum, ac fideles compellendi ad subscribendum suæ Sententiæ; hos proinde teneri eidem acquiescere interna mentis & judicii adhæsiōne, non solum religioso, ut vocant, silentio; atque hujusmodi Judicium nullatenus errori esse obnoxium. Constitutioni *Unigenitus*, ut dogmatico Sanctæ Sedis Romanæ & Universalis Ecclesiæ Decreto, omnimodam ab omnibus obedientiam deberi affirmo.

Dico cum *Avito Viennensi Episcopo*, in rebus, quæ ad Ecclesiæ statum pertinent, si quid dubitationis fuerit exortum, ad Romanæ Ecclesiæ Maximum Sacerdotem, quasi ad Caput nostrum, esse referendum.

Circa Decretales Romanorum Pontificum Epistolas, profiteor cum *SS. Gelasio, & Leone*, eas venerabiliter suscipiendas esse, & sancte custodiri debere.

Affirmo Romano Pontifici jure divino competere Jus indicendi, dirigendi, & confirmandi Universalia Concilia, quæ per ejus concursum plenam



plenam fortiuntur firmitatem, & infallibilitatem, independenter a quacumque alia acceptatione.

*Concilium Tridentinum* non tantum in Causis Fidei, sed etiam Disciplinae liberum fuisse profiteor, non obstante, quod pro illorum temporum & rerum circumstantiis in eadem Sacrosancta Synodo non potuerint omnia de quorundam etiam proborum Virorum voto ac desiderio reformari. Causas Criminales Episcoporum per *Concilium Tridentinum, Sess. XXIV. Cap. 5.*, Summo Pontifici, & Apostolicæ Sedi merito reservatas iudicō. Cumque eadem Sacra Synodus, *Sess. XIV. Cap. 1.*, declaraverit Pontifices Maximos, *pro suprema potestate sibi in Universa Ecclesia tradita*, Causas aliquas Criminum graviore merito potuisse suo peculiari iudicio reservare; non arbitror licere apertam hanc Synodi declarationem eludere, aut obliquis & coactis interpretationibus evertere, quasi hæc potestas Summo Pontifici non competeret proprio, ac originario, divinoque jure. Habet proinde idem Pontifex, & jure exercet in Universa Ecclesia potestatem dispensandi ex legitima causa in lege per Generale Concilium lata.

Primis jam tum Ecclesiæ temporibus ii censebantur Spurii, adulterinique Episcopi, quorum Romanus Pontifex Ordinationem, seu, Electionem absolute respueret, veluti *ULTRAJECTINORUM Pseudo-Episcoporum*, aliorumque eidem Communioni, atque Causæ adhaerentium. Quamvis autem antiquioribus temporibus Confirmatio, & Consecratio Neo-Electorum Episcoporum ad Provinciales Synodos, præcipue vero ad Metropolitanam pertinuerit; attamen legitimis de causis hæc disciplina per Universum Occidentem mutata fuit, neque pristinam hac in parte disciplinam reduci posse existimo, nisi de pleno atque libero Summæ Sedis assensu. Idem de Translationibus, & Depositionibus Episcoporum, nec non de Erectionibus novarum Sedium Episcopalium servandum iudicō.



Canonizatio Servorum DEI per Papam *Alexandrum III.*, ad evitandos innumeros abusus, soli Romano Pontifici, seclusis Episcopis Diocesanis, merito reservata est. Quamquam & antiquioribus temporibus, ut habetur ex *Benedicto XIV. Lib. v. de Beatif. & Canon. Serv. Dei Cap. 10. num. 1.*, Beatificationes ipsæ, quæ fiebant ab Episcopis, vim obtinebant Canonizationis, vel per expressam Summi Pontificis approbationem, vel per universalem, extra Concilium, Ecclesiæ consensum, in quo tacita Summi Pontificis approbatio continebatur.

Quamvis olim vix aliæ Causæ, quam Majores, ex Provinciis ad Romanam Curiam deferrentur, attamen hodie in reverentiam Summæ Sedis, ac pro Suprema potestate eidem in Universa Ecclesia divinitus tradita, legitimo communique usu invaluit, ut in quibusvis Causis Ecclesiasticis ad Summum Pontificem appellatur, ita ut ejusdem Sanctissimi auctoritate in suprema instantia judicetur, tum Romæ per Judices Ordinarios ibidem constitutos, tum per Delegatos in partibus, pro diversitate locorum, morum, & Concordatorum.

Summi Pontifices *Pius II.*, *Julius II.*, & *Gregorius XIII.* omni jure damnarunt Appellationes a Papa ad futurum Concilium, cujus damnationis causas suis Constitutionibus explicant. Sane jam antea reprobata comperimus a *Gelasio* Appellationes a Sede Apostolica: *Siquidem ad illam de qualibet Mundi parte Canones appellare voluerint; ab illa autem nemo sit appellare permittus.*

Equidem primævo Ecclesiæ usu omnia Beneficia ad Episcopi, tanquam Ordinarii Loci, dispositionem, seu collationem pertinuisse videntur; attamen cum sanæ rationis sit, ut Summus & Universalis Pontifex plurium in Provinciis gratiarum dispensator existat, sic minime injustæ, imo huic Summi, & Universalis Pontificis qualitati consonæ fuerunt Beneficiorum Reservationes, quæ deinceps Nationum Concordatis firmatæ, & respective moderatæ sunt. Hæc Concordata,



ta, utpote vim pacti habentia, religioſe omnino ſervanda ſunt. Declararunt autem ſæpius Romani Pontifices, ſignanter *Gregorius XIII.*, longe a ſuo Animo abeſſe Concordatorum, nominatim Germaniæ, infraſionem.

Annatæ ad ſublevandas neceſſitates Romanæ Curia, pro omnibus Eccleſiis excubantis, laborantis, & ſumptus portantis, pro legitimis habendæ; atque ut tales, eo ſaltem uſque retinendæ ſunt, donec alia aequæ commoda ratione, Apoſtolicæ Sedis iudicio, ſuſtentioni, atque innumeris oneribus ejusdem Curia proviſum fuerit.

Exemptio Regularium (quorum magna in Eccleſia eſt utilitas), eorundemque immediata ſubjectio ad Apoſtolicam Sedem, legitimis ex cauſis, in bonum non tantum Religioſorum Ordinum, ſed etiam Univerſalis Eccleſiæ, videlicet ad faciliorem eorundem ſub uno Supremo Capite gubernationem, introducta, & ab omnibus Eccleſiis agnita, nedum a Seculari poteſtate, ſed nec ab una particulari Synodo abrogari valet. Abuſibus, ex hac Exemptione naſci valentibus, per *Concilium Tridentinum* occurſum, & proviſum eſt.

Sciò Episcopos non ab Eccleſia, ſeu fidelium Univerſitate, ſed a Spiritu Sancto poſtos, ut commiſſos ſibi Greges intra ſuas ſolum Diœceſes paſcant & regant, cum debita ad Romanum Pontificem ſubordinatione. Quamvis autem illi primis Eccleſiæ temporibus ampliorem, pro varietate diſciplinæ, in his quæ jurisdiſtionis ſunt, poteſtatem exercuerint; potuere tamen Canones ejus uſum intra ſtrictiores terminos coercere, quos privata authoritate extendere nefas foret.

In illis, quæ ad Fidem, Sacramenta, & Eccleſiaſticam Diſciplinam pertinent, poteſtas Eccleſiaſtica pleno jure decernit, ſine concuſſu poteſtatis Civilis; ratione tamen mutua Protectionis, quam ſibi invicem debent, ad hanc ſpectat, juxta mentem Eccleſiæ, & quantum ipſa optat, ejus Canones prote-



gere, & exequendos curare per media temporalia.

Finaliter judico, curandum omni legitimo, ac meliore modo, ut pax & concordia inter Ecclesiam, & Rempublicam perpetuo retineatur; atque adeo, quoad Fides & Religionis iura patiuntur, vitandas esse occasiones offensionum, unde & diffidia oriri, & gravia mala in Religionis detrimentum timeri possent.

Accipe, SANCTISSIME PATER, has Assertiones, velut tesseram genuinæ meæ sententiæ de divinis, atque eminentioribus Tuis, Tuæque Sedis juri-  
bus, tanquam monumentum revocationis omnium, quæ adversum ea, & si quæ fortasse alia veræ doctrinæ Capita, seu universalis Ecclesiæ jura ( licet præter intentionem ) a me quavis via, aut modo dicta, scriptave fuere, vel scripta videri possent.

Si quid ultra est, quod circa Fidei, seu Doctrinæ meæ professionem ac declarationem, quam in omnibus Sanctæ Romanæ, atque Apostolicæ Ecclesiæ conformem esse cupio, jubes, aut postulas; habebis me semper ad eandem germana sinceritate edendam obedientem ac promptum. Non negabis interim ( sic humillime confido ) veniam erranti, qui medias etiam inter deviationes nihilominus cum Patribus *Concilio Lateranensis* semper agnovit, & quoad vivet, agnoscet, Romanam Ecclesiam, disponente Domino, super omnes alias ordinariæ potestatis obtinere Principatum, utpote Matrem Universorum Christianissimum; qui cum *Divo Bernardo* sine fraude & furo profitetur: esse alios aliis assignatos Greges, singulis singulos; Tibi universos, uni unum, non modo Ovium, sed & Pastorum, tanquam uni omnium Pastori; qui cum *S. Hieronymo* non ignorans Romanam Ecclesiam supra PETRAM, qui CHRISTUS est, ædificatam, nihil magis desiderat, quam Cathedræ PETRI ( qui etiam *per Christum factus est Petra*, ut ait *S. Maximus Taurinensis* ) perpetuo consociari. Suscipe me in hanc Unionem; redde pœnitenti filio paternum affectum; & in pignus hujus gratiæ da jacenti ante Sacros Pedes Tuos,



eosque deosculanti Apostolicam Benedictionem.  
**SANCTITATIS TUÆ**

Treviris 1. Novembris An. MDCCLXXVIII.

*Humilimo & Obedientissimo Filio*

Joanni Nicolao ab Pontheim Episcopo Myriophitano, Suffraganeo Trevirensi M. propria.

**Noftras modo in forma Brevis Litteras,**  
quibus ad utrumque respondimus, audietis.

*Postremo ab eodem lectæ sunt Epistole  
Sanctitatis suæ ad utrumque*

Venerabili Fratri Clementi Wenceslao Archi-Episcopo Trevirensi, & Episcopo Augusano, S. R.

I. Principi Electori.

**PIUS PAPA SEXTUS.**

**V**enerabilis Frater, Salutem & Apostolicam Benedictionem. Nihil Nobis gratius, atque acceptius Tuis Litteris contingere unquam potuit, Venerabilis Frater; nihil iis, quæ Nobis ipsæ attulerunt, exoptatius. Incredibile est, quanto inde, quamque immenso repleti gaudio sumus: idque Tu ipse magis ex Tuo lætitiæ sensu existimare poteris, quam Nos ullis Tibi significationibus exponere valeamus. Illo, quem nunciasti, successu, illo, quem transmisisti, *Retractionis* Libello, gravissimam detraxisti Nobis, quæ jamdiu Animo infixæ erat, de *Febronianis* Scriptis sollicitudinem; quantumque antea de illatis illinc in Ecclesiam damnis dolebamus, tantam nunc in spem inducimur fore, ut iis ipsis Scriptis jam a suo Auctore repudiatis, abdicatis, ac damnatis, accepta detrimenta sarciri tandem ac refici videamus. Hunc a DEO ipso rei exitum eo magis expectamus, quo magis illius Digitum, Cor hominis altissime pervadentem, atque immutantem agnoscimus. Tuos ille sermones, cum Episcopo Myriophytano Suffraganeo Tuo a Te habitos, Tua in ipso ab errandi via deducendo consilia, Tuas actiones pro sua gloria,



ria, atque Ecclesiæ utilitate susceptas sui Spiritus afflatu moderabatur, sua ope præsidioque muniebat, opportunitatesque omnes, & differendi, atque agendi tempora sapientia sua gubernabat. Illi igitur, qui dives est in misericordia, summæ immortalesque habendæ sunt a Nobis gratiæ, quod & Tua vota, studia, ac labores, & Nostras non intermissas preces, ac lacrymas, in Cordis humilitate ad eum fufas, tam liberaliter, tam benigne tandem respexerit. Verum cum ab ipso Tua fuerit opera, tamquam suæ miserationis instrumentum, adhibita, ipsam hanc tam egregiam, tamque excellentem operam ac Virtutem Tuam intima Animi Nostri comprobatione prosequimur, atque in Cælum extollimus; Tibique, Venerabilis Frater, ita gratulamur, ut nihil unquam a Te in Tuo Episcopali munere neque gloriosius, neque utilius suscipi, atque effici potuisse Apostolica voce prædicemus. Summa esse Tua fatemur de Nobis, de Sancta hac Sede, Ecclesiæque Univerfa merita, ac maxima inde, nec unquam interitura accessisse ad pristinam Tuam laudis ac splendoris amplitudinem veræ solidæque gloriæ ornamenta. Hæc eximia Nostra de Te judicia pari etiam gratissimi Animi testimonio, summique in Te amoris, existimationis, ac studii declaratione cumulamus. Proinde quod Tu nunc a Nobis vehementer exoptas, atque efflagitas, ut Venerabilem Fratrem Joannem Nicolaum Episcopum Myriophytanum jamdiu aberrantem, ac ad Nos modo revertentem, in gratiam benevolentiamque Nostram restituamus, magnopere quidem gaudemus in eo, quod Nostra Animi inductione cupidissime præstituri sumus, una etiam Nos esse Tuo huic gravissimo postulato præclare satisfacturos. Itaque omnia, prout fieri a Nobis cupis, ab ipso antea in Apostolicæ huius Sedis Ecclesiæque jura perperam atque inconsulte dicta, scripta, actaque ex Animo remittimus, condonamus, atque ignoscimus; ad eaque respicimus, quæ nunc consecuta sunt, quæ



nimirum a Te, atque ab illo ipso etiam de præsentis suo Animi sensu ad Nos deferuntur; eundem in paternæ Caritatis sinum, atque in complexum Nostrum libenter, amanterque recipimus, ac tamquam inventam Ovem, quæ perierat, humeris Nostris imponimus, atque ad hanc solidissimam Veritatis Petram læti exultantesque reportamus, ac inter ceteros Coepiscopos Fratres, itemque Filios Nostris adnumeramus; & quo amplius habeat paterni hujus Amoris, lætitiæque Nostræ argumentum, non mediocri etiam laude & commendatione hanc ipsius actionem exornamus. Commendari enim oportere a Nobis intelligimus ejus cum ingenii docilitate conjunctam Animi fortitudinem, quæ in suo hoc factò perspicue conspicitur atque eminet, dum illas suas, quas tantopere adamarat antea, propugnaratque Sententias, abjicit nunc, ac detestatur, dum plurimorum huic Petri Cathedræ aut adversantium, aut invidentium, quos undique in suas partes laudesque pertraxerat, judicii non retrahitur, non permovetur. Quid hoc est, nisi quodammodo pro veritatis, quæ affulsit, amore semetipsum contemnere, ex Saulo novum in se Paulum exprimere, de ambitione, de sui laude, de profani Sæculi hujus aura fortiter, egregièque triumphare? Quo certe humanæ Naturæ imbecillitas perungere non potest, nisi divina ope fulta, ac roborata. Divinæ igitur voluntatis rationibus inhærere Nos putamus, dum eundem singulari laude prosequimur, quæ potissimum in Dei ipsius gloriam est redundatura. Idcirco jam nunc ipsi amantissimis respondemus Litteris, quas hisce conjunctas ad Te transmittimus; in iisque intimæ reconciliationis, gratiæ, laudationisque Nostræ testem Apostolicam Benedictionem ex animo concedimus. Ut autem ad Te regrediamur, Venerabilis Frater, ita tua hac virtute, tuaque felicitate gaudemus, ut plurimum ob ipsum etiam tam singulare, tamque præstans exemplum, in Te



splendoris, in Apostolicam Sedem, utilitatis adjunctum iri cumulum judicemus. Maximo enim exemplum illud ceteris omnibus Episcopis incitamento ad Sacra tuenda, & propugnanda Jura futurum confidimus: Eos vero acerrime poterit sua claritate ac luce ad imitationem impellere, quibus ob locorum propinquitatem erit ipsum multo conspectius; quibusque deesse jam hoc tempore non potest ejusmodi exhibendæ, exercendæque virtutis copia. Nunc vero, etsi Te ipsum imposterum Tui similem futurum non dubitemus, valdeque lætemur nulla Te hortatione indigere, qui tua sponte ad præclara quæque inflammaris; tamen ut magis Tibi constare possit, quantum adhuc tua virtute nitamur, illud nunc a Te expectamus, ut quem a DEO recepit Suffraganeus Tuus docilitatis spiritum, eodem pro tua apud ipsum auctoritate velis uti ad debitam ab ipso exigendam, quam promisit, operam, qua illud errorum propugnaculum, quod jampridem excitavit, idem ipse sui ingenii, suæque doctrinæ ope dejicere, ac funditus delere pergat; ex quo certe præcipuum ipsi illi Retractioni suæ pondus adjungetur: Tecum præterea S. Leonis Magni adhibemus ad Theodoretum, Cyri Episcopum scribentis verba: (a) *Victoria, quam Christus Dominus Noster suæ donavit Ecclesie, quamdiu in hoc Mundo versamur, licet fiduciam maiorem tribuat, non tamen in totum sollicitudinem perimit, nec ut dormiamus donata est, sed ut suavius vigilemus.* Jam quod reliquum est, & perspectissima Nobis antea erant Tua in Nos, & Apostolicam hanc B. PETRI Cathedram studii, conjunctionis, observantiæ, pietatisque officia; & nunc adeo grata & jucunda est eorundem in Epistola tua luculentissima confirmatio, ut nihil cupiamus magis, quam palam omnibus facere posse, quantam Tui, Tuæque Dignitatis ac Virtutis rationem habeamus, quantumque ad ea omnia præstanda, quæ ad Tuæ laudis gloriæque incrementa faciant,

(a) *Epist. 93. Cap. 6. Part. 2. Oper. cit. Edit.*



atque ab hujus S. Sedis beneficentia proficisci possint, potissimum incendamur. Interim Deum Opt. Max. precamur ut cum ipse præstantium tuorum meritorum suavor, impulsor atque auctor extiterit, idem etiam esse suorum in Te munerum amplificator velit. Atque hujus divinæ benignitatis auspiciem Apostolicam Benedictionem Tibi, Venerabilis Frater, Tuæque fidei concreditis populis intimo paternæ Caritatis sensu amantissime impartimur Datum Romæ apud Sanctum PETRUM sub Annulo Piscatoris die XIX. Decembris MDCCLXXVIII. Pontificatus Nostri Anno Quarto.

*Benedictus Stay.*

Venerabili Fratri Joanni Nicolao Episcopo Myriophytano.

## PIUS PAPA SEXTUS

Venerabilis Frater, Salutem & Apostolicam Benedictionem. Quod summopere semper optavimus, quodque a DEO Optimo Maximo omni animi contentione precati sumus, ut Tu, Venerabilis Frater, cordis dolore tactus intrinsecus, tandem aliquando a suscepta jamdudum offensionis atque erroris semita Illius miseratione digredereris, Teque ipsum ad veræ doctrinæ lucem revocares; id nunc contigisse & ex Litteris Venerabilis Fratris Clementis Wenceslai Trevirensis Archiepiscopi, & S. R. I. Principis Electoris, & ex transmisso Nobis Tuo Retractionis Libello incredibili paterni Nostri animi jucunditate intelleximus. Maximas extitisse Nobis a Te antea doloris, atque ægritudinis causas, ipse facile percipere potes; cum Te nimirum intueremur hujus Apostolicæ Sedis beneficio ad Episcopatum evehctum, ipsique tanto necessitudinis nomine devinctum, tamen insurrexisse ad eandem oppugnandam, idque conari, ut ejus antiquissima jura, atque a Christo Domino derivata privilegia minueres, ac labefactares. Divinis Nos sane freti promissionibus certissime confide-



barnus, solidissimam hanc Veritatis PETRAM nul-  
 lis unquam adversis ventis ac tempestatibus con-  
 cuti posse, atque ad ruinam impelli. Sed &  
 Tuam dolebamus vicem, qui Te tantopere a Nobis  
 averteres, atque aberrares; & eorum etiam omni-  
 um errorem perniciemque desolebamus, quos in-  
 genium tuum, amplaque eruditionis, ac doctrina  
 species ad tuas partes, hoc præsertim adversissi-  
 mo Ecclesiæ ac Religioni tempore, facile pertra-  
 hebat, atque aggregabat. Has pristinas gravissi-  
 mas molestias, perpetuasque sollicitudines Nostras  
 non idcirco nunc commemorandas suscepimus,  
 Venerabilis Frater, ut Tibi quidquam exprobrare  
 videamur; sed ut luculentissime declarem, in quale,  
 quantumque illæ jam conversæ sint gaudium, quam-  
 que ex ipsa superioris temporis recordatione sen-  
 sus in Nobis Tuæ hujus reversionis fiat jucundior.  
 Cognoscimus certe in Tuis hisce immutatis con-  
 siliis DEI virtutem ac misericordiam, qui non  
 reliquit Te usque in finem, sed novam Tibi  
 mentem voluntatemque per Sanctum SPIRITUM  
 immisit, atque indidit; eique quantas maximas  
 possumus intima Animi fide gratias persolvimus;  
 Teque etiam hortamur, ut hæc ipsi debita Tuæ  
 Religionis Officia in humilitatis sensu exhibere,  
 ac referre nunquam intermittas. Porro ut Tu ipse  
 pro tanto beneficio, post DEUM, unice obstrictus  
 es eidem Trevirensi Archiepiscopo Tuo; ita Nos  
 itidem plurimum ipsi debere ultro profiteamur, qui  
 sua tandem opera, Sapientia, ac Virtute perfecit,  
 ut divina ope Te ad hanc Beati PETRI Cathe-  
 dram cum gemitu sisteres, implorares veniam,  
 ad ejusque cultum, obsequium, ac reverentiam  
 puro corde, & conscientia bona, & fide non ficta  
 redires. Hoc nimirum de Te persuadent. Nobis,  
 præter summam ejus amplissimi Viri auctoritatem  
 ipsa ratio Epistolæ ac Retractationis Tuæ, in qua  
 post plurima singillatim, atque accurate expressa,  
 a Teque revocata, Animum præteritorum omnium  
 pœnitentem exhibes, eumque in modum compara-



tum esse confirmas, ut cetera etiam, quæ non expresseris, contra Apostolicæ Sedis decreta, ac doctrinam a Te unquam prolata, statim ut admonitus fueris, Te ad veritatis normam redacturum esse pollicearis. Hoc optimæ voluntatis Tuæ testimonium Nos perlibenter suscipimus; hoc certum tuæ constantiæ pignus esse existimamus. Proinde remittentes Tibi quascumque Canonicas, & Spirituales pœnas, Te, Venerabilis Frater, quod tam enixe a Nobis suppliciterque postulas, in Nostram, & Sanctæ hujus Sedis gratiam reconciliamus, ac restituimus; Tibi pacem, quam a Christo Domino didicimus, largimur; Tibi paterno amplexu occurrimus; Te inter Episcopos Collegas Nostros adnumeramus, atque amantissimis Verbis Filium etiam Nostrum compellamus. Dum hunc Nostrum, ut vides, amorem Tibi tam prolixè deferimus, eundem etiam cum plurima tui commendatione ac laude jam nunc conjungere minime dubitamus; neque enim dissimulare possumus in Tua hac Actione conspici a Nobis & docilitatem ingenii, & magnitudinem animi Tui. Nam quid majus a Te fieri, quid fortius potuit, quam discussa errorum caligine, a pristina mentis elatione ad christianæ humilitatis sensum demitti, tuas abjicere ac reprobare sententias, veritati posthabere exoriturus de Te rumores, Temetipsum quodammodo vincere atque contemnere? Quod quanto difficilius est, humanæque Naturæ vires excedens; tanto magis intelligimus abundare in Te divitias gratiæ & bonitatis DEI. Ita certe Boni omnes, quorum gravissima apud Te esse debent judicia, Nobiscum sentient, cum Nos, quæ operata sit in Te Dextera Domini, palam faciemus. Tu itidem, Venerabilis Frater, illud nunc potissimum age, ut omnes populi publica tua veritatis a Te agnitæ confessione, divinæque potentiæ celebratione quid per ejus misericordiæ gratiam sis consecutus, intelligant. Maximum existima, atque opportunissimum illati a Febronio in Ecclesiam detrimenti fu-



turum remedium, si Tu ipse, qui eos Libros conscripsisti, eosdem, ut erant antea ad plurimorum ruinam, ita nunc ad ipsorum ædificationem refutes, convineas, ac redarguas. Etsi provector jam ætate sis, integris tamen adhuc Te, DEO juvante, pollere cum Animi, tum Corporis viribus non ignoramus. Quid potius igitur, quid utilius, quid præstantius reliquo vitæ tempore facias, quam, ut qua manu vulnera Ecclesiæ, atque Apostolicæ Sedi inflixisti, eadem illa ipsa alligare, ac perfanare omnî studio, ac labore contendas? Habes profecto plurimos, quos imitere, præcedentibus Ecclesiæ temporibus insignes & sanctitate & doctrina Viros, qui nedum prioris ætatis errata retractare veriti non sunt, sed eadem semel detecta constantissime rejicientes, maximam hoc ipso apud omnes suo nomini gloriam compararunt. (a) Eja igitur, VENERABILIS FRATER, *exere vires*, Te ipsis S. JOANNIS Chrysoptomi verbis excitamus, (b) *forti ter dimica, atrociter proelio isto concerta, considera pactum, conditionem attende, militiam nosce, pactum, quod spondidisti, conditionem, qua accessisti: militiam, cui nomen dedidisti* Tibi etiam S. Bonifacii Moguntini Episcopi, Germanicæque Apostoli, plenas auctoritatis voces subjicimus, quem Tibi ignotum esse non potest aliquantulum etiam ad Palatiolum Monasterium

prope

---

(a) *Epist. Maximi, Urban., Sidon. & Machar. de suo reditu ex schismat., L. inter. Epistol. S. Cyprian. Edit. Paris. cum Annotat. Pamel. ann. 1603. S. Augustin. in Prolog. lib. Retraction. Tom. 1. Operum Edit. Paris, Monachor. S. Maur.: Neque enim quisquam, nisi imprudens, ideo quia meâ errata reprehendo, me reprehendere audebit. Sed si dicit, non ea debuisse a me dici, quæ postea mihi etiam displicerent, verum dicit, & mecum facit. Eorum quippe reprehensor est, quorum & ego sum. Neque enim ea reprehendere deberem, si dicere debuisssem.*

(b) *Serm. de Martyrib. Quod aut imitand., aut non laudandi sunt Tom. 3. Oper. Edit. Paris. 1581. pag. 849.*



prope Treviros constitisse (a) Ille ad Zachariam scribens testatur nihil tam se optare, quam Catholicam Fidem & Unitatem Romanæ Ecclesiæ servando dilatare, & quantoscumque audientes, vel discipulos in ista Legatione mihi Deus donaverit, ad obedientiam apostolicæ Sedis invitare, & inclinare (b). Nos vero Tibi ipsum Zachariæ ad Bonifacium responsum damus: Domini deprecamur clementiam, licet peccatores, ut suo Te muniat, & consortet auxilio, Nosque annuat prosperitatis tue semper læta suscipere nuncia (c). Demum pro DEI benignitate nova, semperque uberiora impofterum a Te lætitiæ Nostræ, Tueque commendationis argumenta expectantes, Apostolicam Benedictionem Tibi, Venerabilis FRATER, cælestium munerum omnium auspiciem, in paternæ gratiæ, pacis, caritatisque amplexu ex Animo, ac peramanter impertimur. Datum Romæ apud Sanctum PETRUM sub Annulo Piscatoris die XIX. Decembris MDCCLXXVIII. Pontificatus Nostri Anno Quarto.

*Benedictus Stay.*

*Hiscæ absolutis, præfatus R. P. D. Stay egressus est e loco Consistorii; & Sanctissimus Allocutionem sic prosecutus est.*

Ex quibus omnibus præclare intellexistis, VENERABILES FRATRES, quid hac in re actum jam sit; præcipue vero constare Vobis potuit, quam candido, sincero, atque ingenuo animo in Cor suum se rediisse fateatur Febronius; &, quod animadverti maxime debet, non temporali ullo commodo illectus, non virium infirmitate fractus, non ingenio debilitatus, nec molestis inductus suasionibus, sed sola veritatis agnitione permotus, sola supernæ gratiæ illustratione perfusus, solo denique salutis suæ desiderio incensus, errores suos singulari studio rejiciat, summaque conten-

(a) Brower. *Annal. Trevirens.* Tom. 1. lib. 7. num. 116. Bollandist. *Act. SS. Junii* Tom. 1. Die 5. §. 2. dein in *Vita ejusd. S. Bonifac.* §. 2. (b) In *Collect. Concilior. Labb.* Tom. 6. pag. 1495. Edit. Paris. 1671.

(c) In *cuat. Collect. Labb.* pag. 1527.



tione ejuret; ut retractationis Libellum, quem PROPRIA MANU TOTUM PERSCRIBERE VOLUIT, selectis PATRUM AUCTORITATIBUS, ET RATIONIBUS ROBORARIT. Nonne hæc est mutatio Dexteræ Excelsi? *Qui innumeris Charissimum donis univrsam Ecclesiæ Corpus exornat, ut per multos unius luminis radios idem ubique splendor appareat, nec possit nisi gloria esse Christi, cujusbet meritum Christiani.* (e) Neque enim exiguum id esse reputamus Episcopi Myriophytani meritum, qui sanctissimos Job, & Davidem imitatus, nullam afferri sibi moram passus est ab importuno, quo imbecilles animi plerumque capiuntur, pudore errata sua consistendi; sed summam ingenii docilitatem, ac miram animi fortitudinem in damnandis sententiis suis, seque ipso pro veritate abjiciendo, declaravit: Audiatur hic AMBROSIVS, cujus verbis dum Febronii laudes cumulantur, vulgi stultitia detestatur: *Amicus DEI, Propheeta DEI, Rex ab ipso electus. DEO, & unctus in Regnum, flagellis se spontaneus offerebas, nec erubescebas; & Tu erubescis? Non multum ista verecundia Tibi opitulabitur, cum ad Judicium DEI veneris: Sed pudoris Te istius penitebit, cum in conspectu non solum hominum, sed etiam Angelorum, & omnium Potestatum Cælestium constitutus, caperis peccata propria non negare . . . Non esset hodie in requie servulus meus Job, si erubuisse tres illos Reges Amicos suos; nec ipse David, si erubuisse delicta propria confiteri . . . Et quis uterque eorum non erubuit factorum suorum pretium in mea ponere potestate, meo se judicio voluntatique committere; nec Ego de talibus Servulis erubescam, ut appellem Amicos meos, qui meam studuerint facere voluntatem* (a) Accedere etiam ad ipsius meritum debet, quod cum a perniciofa dissensione ipse jam discessisset, ab eadem itidem suo exemplo brevi abducturum eos confidamus, qui hæcenus illius, tanquam sui Ductoris, signa sunt secuti.

Si Dioscori interitus, qui in sua sentiendi pravitare obiit, ut scribit Leo Magnus, (b) *in profundio-*

(e) s, Leo M. serm. 63, Cap. 7. Part. 1. Oper. cit. Edit

(a) Enarrat. in Ps. David. 37. n. 51. Tom. I. Oper. col. 838. Edit. Monach. S. Mauri. (b) Epist. III.



*ra deiecit affectus ejus, & perfidiae incentore sublato instabiles quaedam, & insipientes animae habent, quod paveamus non habent, quod sequantur; quales nunc esse Febroniani debent, Auctorem suum videntes, non jam extinctum, sed immutatum, sed Sectatorum omnium in se ipso damnantem errores? Habent illi adhuc quem sequantur, si ipso praecunte redire ad officium, ad sanitatem velint; sin renuant, & in sua defecti-  
 one persistant, quid jam illis supererit, detracto Duce, nisi ut incerti paveant, confusi ut erubescant? Qui enim se a Romana Ecclesia sejungunt, in eaque constitutam Unitatem dividunt, dum amantissimae suae Matris sinum, & amplexum recusant, omnem suam substantiam quasi profugi, & inopes dispergunt. Verumtamen pergant illi, quas libuerit, fraudes insidiasque huic Ecclesiae struere, atque inferre calumnias, &, ut magis adhuc obtrectent, Seculi Potestatibus eandem obistere, atque adversari clament; tamen vel inviti agnoscant, ac fateantur necesse est; quanta nunc iis auctoritatis species decesserit quamque in apertum aggerata illa falsitatis commenta proferantur. Neque se magno similiter errantium numero tueri poterunt, sibi que de multitudine blandiri; ut enim Ambrosius egregie monuit: (c) *Multitudo sociorum impunitatem non facit criminum: Nam in Sodomam, & Gomorrhā, & in totis quinque Civitatibus innumerabiles utique habitabant Populi, & omnes pariter igneis imbris conflagravit.**

Nos interea Myriophytanum Episcopum, qui manifesta professione a se abjecit ac repulit quidquid in Scriptis suis Romana detestatur Ecclesia, & nihil simulatum, nihil obscurum, nihil ambiguum in sua Retractatione intexuit, diutius morari non possumus, quin, etsi magno a Nobis locorum intervallo divisum, in Spiritu Caritatis amplectamur; & ab ineffabili misericordia DEI non judicemus alienum, sed omnis culpae abolitionem, & Apostolicæ pacis gratiam impertiamur: *Nullas paritur veniæ moras vera Conversio; & in dispensandis DEI donis non debemus esse difficiles, nec accusantium se lacrymas, gemitusque negligere, cum ipsam*



*pœnitendi affectionem ex DEI credamus inspiratione concepiam.* (a) Aliter, uti docuit per aptissimas similitudines Cyprianus, (b) præcluderemus atque abscinderemus iter doloris, ac pœnitendi viam; & dum fructus pœnitentiæ intercipitur, pœnitentia ipsa tollitur. Supremus enim Creator noster magis placatur voluntate, quam sanguine, ut ostendit in Abraham, cujus fidem in Filii oblatione requirit; at si eum iussit offerri, tamen non permisit occidi: (c) Huic Nostræ voluntati magnum adiecit incitamentum Trevirensis Archiepiscopus, qui id ipsum a Nobis summo studio postulavit. Ipsi non solum omnem habemus, pro sua amplitudine, ac virtute, fidem; sed tantum existimationis, caritatis, ac laudis pro innumeris, suis in Ecclesiam meritis deferimus, ut incredibilem in modum illius studiis, illius gloriæ faveamus. Ejus maximæ, post DEUM, in eximio hoc opere partes extiterunt; ejusdem Consiliis, atque Actis, tam præclara incepta præclariore sunt exitus consecuti, Summa est præterea ipsius Nobiscum conjunctio, summa erga Apostolicam hanc Sedem observantia. Quapropter dum ipsum debita hac prædicatione prosequimur, dum tantopere de sua pietate gaudemus; adhuc multo majore fiducia nunc ab ipso petimus, eumque obsecramus, ut pastorali Animo pergat Adversariorum Machinamenta confringere, Cœpiscoporum excitet diligentiam, ut quos eadem, Unitatis causa conjungit, eodem ardore inflammantur in revocandis iis, qui a veritatis semita inconsultius deerrarunt in suis Ecclesiis, ut ita *Domini ovile reparetur, & per sollicitudinem Caritatis atque doctrinæ, omnes Christi Oves unum se sentiant habere Pastorem.* (d)

Hæc sunt, VENERABILES FRATRES, quæ in sinu Nostro diutius continere præ gaudio non potuimus, quæ

---

(b) *Lib. de Lapf. Virginis consecr. Cap. 9. num. 41. Tom. 2. Oper. col. 316. supracit. Edit. Paris.* (a) *S. Leo M. Epist. 83. Cap. 4.* (b) *Epist. 59. juxt. Edit. Pbrif. 1603*  
 (c) *S. Petr. Chryf. Serm. 108. Edit. Lugdun. 1627.*  
 (d) *S. Leo M. Epist. 141. in fin.*



quin Vobiscum communicarem; ut quos antea sollicitudinis, ac doloris socios habuimus, nunc consolationis Nostræ compotes, participesque faciamus. Præclaram tribuit annunciandæ hujus lætitiæ opportunitatem, illamque potissimum auget, hæc ipsa solemnitas, quam celebramus, Reparationis dies. (a), iniqua *Rex pacis, cum sua pace procedens, fugavit omne fidi-  
fidium*

(a) Alexander PP. VI. uti proditum in Diario Burhardi Cæremoniarum Magistri, habuit die 25. Martii 1498. Consistorium secretum, recurrente Dominica quarta Quadragesimæ, *Lætare* nuncupata, in quo providit nonnullas Episcopales Ecclesias. Benedixit Rosam auream; & deinde venit ad Capellam majorem, in qua celebravit Missam Card. Perusinus.

Julius PP. II., teste Diario Paridis de Crassis Cærem. Mag. habuit Consistorium secretum in Aula Paramentorum die 23 Februarii 1505., recurrente Dominica tertia Quadragesimæ; & postea venit ad Capellam, in qua Missam cantavit Archiepiscopus Atheniensis Adfistens.

In Diario Phebei Cærem. Mag., A. 1646., legitur: *F. 2. die 12. Mensis Martii, licet sit Festum Palatii, videlicet S. Gregorii Magni, tamen habitum est Consistorium secretum, præsentibus triginta Cardinalibus in quo propositæ sunt multæ Ecclesiæ, & petita Palliam pro Ecclesia Strigoniensi &c. Heri mane, cum Sanctissimus (Innocentius PP. X.) Cursori dixisset, quod hac mane esset Consistorium, dictum est respondisse: Esse Festum Palatii, & ideo celebrari non posse Consistorium. Cui quam prudenissime Summus Pontifex, Possumus, inquit.*

Clemens XIII. die 24. Decembris 1767. mandavit indici Consistorium secretum, dum cantabatur prim. Vesper. Nativitatis D. N. J. CHRISTI; quibus expletis habuit Consistorium in Aula Consistoriali Palatii Quirinalis, & gravi Allocutione exposuit necessitates Catholicæ Ecclesiæ, & decrevit solemnem utriusque Cleri Supplicationem ha-



*fidum, dissensiones depulit, discordiam perturbavit, & sicut  
Cælum splendor Solis, ita Ecclesiam fulgore pacis illumina-  
vit . . . ut nunc procedente Christo Rege pacis om-  
nino, quod triste est, auferatur a medio, & illuciferno ve-  
ritate: fugetur mendacium. (a)*

Hic etiam aptissimus se obtulit Nobis ad Vos  
alloquendum locus, e conspectu nempe gloriosæ Con-  
fessionis Principis Apostolorum, qui Petra est, ac  
quam eliduntur filii Babylonis, & obtinens cum lateri-  
no Sacerdote indeficiens confortium. Sedi suæ præ-  
esse non desinit, ut omnino Febronii penitentiam  
ejus patrocinio referre debeamus.

Plurimam quoque iocunditatem attulit Vos al-  
loqui e latere Corporis Magni LEONIS, quo CHRISTUS  
nititur assertore; ejus Scripta suavissima præbent le-  
gentibus spectacula, quemque *Advocatum, & Propu-  
gnatorem veritatis invenimus. (b)*

Gloriemur itaque in DOMINO, VENERABILES  
FRATRES, & causam hujusce actionis ad originem su-  
am, caputque ferentes, illi immortales gratias, illi  
laudem, gloriam, & honorem tribuamus, in cujus ma-  
nu & hominum corda, & momenta sunt temporum.

bend. die 28. ejusd. Mensis, Fest. SS. Innocenti-  
um, in Basilica Vaticana. Cui idem Summus Ponti-  
fex cum Sac. Cardinal. Collegio, ac omnibus Ro-  
manæ Curie Præsulibus interfuit.


(a) *S. Perr. Chrysol. Serm. 149. cit. Edit.*

(b) *Theodoret. Episc. Cyr. ad S. Abund. Episc.  
Comens. apud Baron. ad ann. Christi 450. n. 32  
Tom. 8. Annal. Edit. Lucens.*





P.V. 37



955528 Bibliotheca 150,-  
P.P. Camaldulensium in Bielany

Depozyt w Bibliotece Jagiellońskiej



04931



P -